


Dabasamokiiwin

Mamow gagashkitomin
ji'gibitinamak



Ge'biminizha'amowaaj o'niigi'igomaag
gaa'bimi gikino'amagozinij oniijanisiwaan
gikino'amadiwigamigong

E'siigwak 2013



l'iwe ga'mazhidojigemagak
awiya ga'dabasamokanaaj
wiiji'bimadizan gawin eta i'ima
gikino'amadiiwigamigong
dazhiizhiwebasinoon. Giin
ga'oniigi'igomaawiyana* gemaa
gaganawenimawasoyan, ono
naanagajitoon, ge'izhichigeyan,
gaye andi'nake'ii ge'izhi
naaji'ba'iweyan.

*O'omaa mazina'iganing, "oniigi'igomaa" ga'inaaganiwij oniigi'igomaag
gaye gaganawenimawasowaaj.

Wegoneniwak awiya gagagwe dabasamokanaaj wiiji'bimadizan ga'ijigaadeg?

Awiya dabasamokanaaj wiiji'bimadizan wiimiigazo gaye gawin
wiiponichigesiin o'owe ga'bimi izhichigej. l'iwe ga'onji izhichigej
e'wiimazhi dodagej, e'wii'onji segi'iwej gemaa migoshkaaji'iwej gemaa
gaye ji'onji maanendami'aaj awiyana gadazhi gikino'amagoziwaaj.
Dabasamokajigewin onjiimagan apii nimashkawizii ga'inendang
gemaa gamamaashkawenimaj awiya.

Miziwe ga'izhi wawiinjigaadeg gikino'amagewi onakonigewin mamakadaabikong o'omaa,
<http://www.e-laws.gov.on.ca>



Dinowi dabasamokiiwinan

Minabigo gaye ge'inagideg ninijaanis etabasamokasoj giishpin saminaganiwisik?

Dabasamokiiwin bebakaan izhinaagwan. Dabishkoo i'ima dino:

- **Wiiyawing** – bakite'odiwin, gaanjiwebiniwewin, gaabiigonang gegoonan gemaa gagimodamaagej
- **Giigidowin** – noojigo izhinikaanidiwin, bapindaagewin, gemaa noojigo ezhinikaanaaj ga'izhinagozinij, ga'ondakanezinij gemaa ga'inadizinij
- **Mamow bimaadiziwing** – gawin owiitagonaasii godagiyan awiyan ga'izhi mamawinowaaj gemaa bagona e'inajimiwej gemaa epabaamajimiwej
- **Ozhibii'iganing** – ozhibii'amagewining e'onji miigazowaagej gemaa e'onji mamiikindiziiwagej
- **Mamakadabikong** (ga'ijigaadeg mamakadabikong ga'onji migoshkaajichigej) – gababaami bagonawimowej gaye nojigo e'inaajimiwej i'ima mamakadabikong ga'onji ozhibii'amading, giigidowinesing (dabishkoo ga'onji ga'onji ozhibii'amadinaniwang) gaye ga'izhi ganawabanjigadegin ozhibii'iganan mamakadabikong.

Wegonen mamakadabikong ga'onji mamiikinji'iwej gemaa ga'onji dabasamokiiij?

Mii'ima mamakadabiko giigidowi abajichiganing ga'inabajitooj awiya:

- E'onji manenda'mi'aaj. Gagwe sasegi'aaj gemaa ayagaji'aaj awiyan.
- Odabajitoo mamakadabikong ga'onji ozhibii'amading, giigidowinan gababaamiwijigadegin, giigidowining ga'onji ozhipii'amading gayega'onji mamawi ganawabanjigaadegin ozhibii'iganan mamakadabikong e'onji sasegimiwej, emigoshkaaji'iwej, e'ayagaji'iwej, jiwiiijiwaasik gemaa nojigo e'inanaajimaaj odizhichigewining gaye e'onji mamizhi'aaj ga'ishi ododeminiij.
- Omamajiinaan, ogawe bisomaan gaye nojigo oda'inaajimaan, babaawabanda'iwe dibinawe odaya'iiminiin, omazinakizowinan gemaa omazinaateshimigowinan gemaa e'onji gagwe sasegimaaj jimiigaanaaj ayiyan.
- Bizhishik wiimiigaazo gaye wii gagwe wiisaga'owe.

Ontario gikino'amadiiwigamigoon, gikino'amagewigimaag andawendagoziwag jiganodamowaaj mamakadabikong ga'onji mamiikinji'idinaniwak giishpin onji mazhibijigemagak gikino'amagewining. Dabishkoo, giishpin gikino'amawaganag mamiikinji'awaaj gikino'amawaganan e'ayagaji'awaaj mamakadabikong e'onji babaamajimawaaj gikino'amadiiwigamigong, gawin dash ewii gikino'amagozij.

Aaniinigo ga'izhinagwak mamiikinji'iwewin gawin bagidinigadesiin ji'izhijigenaaniwak.

Dabasaamokiiwin onjiimagan bebakaan ga'izhi ga'nawabanjigadeg mashkawiziiwin. Mii'iwe ga'ijigadeg dabishkoo bezhig gikino'amawagan esaziikizij, gema bakaan e'ondakanezij gema e'paatiinonij gaminowiijiwigoj apiich godak.

Bezhiwan ina izhise gii'azhidemidiniwak i'iwe dabasaamokiiwin?

Eshkam ayyak owani nisidawinanaawaa gii'azhidemidiniwak dabishkoo e'onji dabasaamokiiiniwak inendamoo, zhagooj bakanadinoo.

Azhidemidiwin ga'ijigadeg apii niizhin gema awashime awiyag mayaa ga'inendasigwaa gegoon gadazhindamowaaj, bebakaan ga'izhi ganawabandamowaaj gegoon. Giishpin dash o'owe ga'dodamowaaj gikino'amawaganag gawin wiin i'iwe shagodamokiiwin ga'dodamowaaj. Abinojiishag odani gikendanaawaa bebakaan awiya ezhi nanagadawendang gegoonan biichiwiin gewiin ga'indedang, shagooj dash ji'ani bimi nisidawendamowaj waawiikaa dabimiseni gaye biinish ani oshkadiziwaaj geyaabi ogani bimi nisidawendaanawaa (Aayanji dakokiiwin: Wiindamagewin oshkadizag onji, bakiiginigan 26).

Apii gii'azhidemidinaaniwak, gakina awiyak gawin zhagwenimosiiwag jiwiindamowaaj mayaa ga'indenamowaaj, gawin dash ayaamagasinoon bezhig eta jigagwedebwej. Bapezhig awiya owiindaan aaniin gaa'ingendang. Mii'imaag ge'onjimagak mino ganawabamidiwin gema maji'ganawabidiwin aaniin awiyag ga'izhi bimi ayazhidemidiwaaj.

Mii'apane i'imaag enoonjiimagak maji'ganawabidiwin giishpin bezhig awiya ganoonji wiimiigazhoj gema gani giikaawedang. Anoonji ombwese maji'ganawabidiwining eniizhiseg. Gaye anoonji gagwe zhagodamokiiiniwan giishpin ga'nanaabi izhiseg gaye enoonji gagwe zhagoojishkadinaniwak mashkawisiwining. Miidash igo geniizhi bimiyaa magak o'owe dinowi dodamowin wa'a awiya ga'mamaashkawenimog megwaa gii'bimi azhidemidiniwak wiinigo jigagwe zhagozitagozij biinish gaye aniiizhiyaa gawin odani gashkitoosiin weweni jigii wawiindang ga'ingendang gaye dash aanjigo awashime anizhaagwenimo. Mii'imaag gegii onjiimagak weweni ga'ishisesinog ga'azhidemisiniwak ji'onji ga'gwe zhagodamokanidinaaniwak.

Gikino'amadiiwigamigong da'onji maamiinonigaade gagwe zhagodamokaniwewin gaye azhidemidiwin ga'izhichiganiwak. Nashke dabishkoo, giishpin ga'azhidemidiniwak, gikino'amagewi anokii'agan da'kii'izhichigeban ji'okwabii'aaj gikino'amawagana'l jidibajimawaaj gaye jiwiidokawaaj jimamawi mamiinwatamadiwaaj owani nisidotadiwiniwaa.

Giishpin zhagodamokaniwewin dojiigadeg, gikino'amagewigimaa oga'nanaagadawendaan aaniin ge'inatooj odonaakonigan, gaye ji'giiwenizha'ondwaa gema ji'zaagidakonindwaa gikino'amawaganag.

Nisin Ontario gikino'amawaganag bezig wa'awe gikino'amawagan (29 percent) dadibaajimo egii dabasamokasoj gadazhi gikino'amagozij, gii'inaajimomagan 2011 nanandawi gikenjigewin anokiiwigamig gakichiwiniwemagak baataa'izhichigewin gaye mamidonenjigani minoyaawin and (CAMH).

Anepiitendagwak dabasamokiiwin ga'dodaagej awiya?

Awiya gadabasamokanaaj wiijbimadisa'i gamamanenjigej gawin bagidinigaadesinon awiya ji'izhichigej. Gawin andawendagosinon jinenjigadeg "dabishkoo awiya gabimoobigij ga'oji izhichigej". Nanandawigikenjigewin miina aazha awiya gaagii ishichigej miigo moozhag ezhigikendaagwak aapiji esanagak o'owe izhisewin, gaye mawaj e'onji gichi mazhisewaaj gikino'amawaganag o'owe ga'dodawindwaa, ga'onji dibendaagoziwaa gaye wiiji bimaadiziwaan, gayesago i'ima ga'onji dibendagozij dazhiikewining.

Baatiinowag abinoojiishag gagiipi dabasamokanindwaa, gewiinawaa anidodamoog eni dabasaamokanaawaaj wiiji abinoojiisha'i, gemaa dabishkoo da'onjiizhiyaawag omamidonenjiganiwaang, odizhiyaawiniwaa, gaye ga'izhi wiijiwaawaaj godagiyan bemaadizini. Oganandawendanawaa ji'wiidokagowaaj gegichi'awadizhini jigii onji gashkichigewaaj weweni jiwiiwawaaj wiijbimaadiza'i, gawin etago i'ima gikino'amadiiwigamigong miziwe sago iimaanake'ii obimaadiziwiniwaa.

Gikino'amawaganag gadabasamokanindwaa migoshkaajiwewag dabishkoo ena'endasigwaa ga'izhi batiinonaniwanig, eshigadendamowaaj, esabiyaasigwaa, ewiimanenjigeshkawaaj, gemaa omamidonenjiganiwaang e'aniizhi akozhiwaa. Aanind gikino'amawaganang baapanisewag gikino'amadiiwigamigong, e'ani dabasisenig odozhibii'ogowiniwaa i'ima gikino'amadiiwigamigong, gemaa eponi gikino'amagoziwaa gamanenimindwaa.

Abinoojiishag gaye oshkaadizag ga'abajitowaaj omashkawiziwiniwaa gaye manejigewin gawin gegoon ogizhizhawendasiiwaa gegoonan. Biinish anizhiyaawag, aapiji ani akwaadiziwag gii'ani gichi'awaadiziwaa. Gichiinendagwan idash jiwidokawindwaa megwaa giibii agashiinzhiwaa jigibitindwaa jimaanenjigesigwaa.

Bezhiwan ina ododanawaa kiiwisesag gaye ikwesesag ga'dabasamokiiwaaaj?

Dabishkoo bigo kiiwisesag gaye ikwesesag dagii mamiikinji'idiwag. Kiiwisesag wiin motinidiwag, ikwesesag wiin bakaan ododanaawaa, dabishkoo epabaamajimawaaj godagiyan gawiiji gikino'amagoziimawaaj gemaa etagonasigwaa gamamiikinji'awaaj i'ima gegoon gadazhi izhichiganiwak gemaa wiijiwidiwining. Gaye ga'ani apiitadiziwaa dabishkoo kiiwisesag gaye ikwesesag onji dabasaamokanidiwag gaye ewii wiijiwidisigwaa.

Andi ge'onji gikendamaan giishpin niniijanis dapasamokanaganiwij?

Abinoojiish gii'agaashiinzhiij magizhwaa gawin ji'gikendamogwen wegonen "awiya gadabasamokiiij" ga'ijigadeg, shagooj dash gikendam awiyan gamanzhi dodagoj, gawiisagendami'igoj, gemaa gamajendami'igoj gemaa gasegi'igoj. Magizhwaa gawin gawiindamagosiin iiwedash ga'onjiizhichigeg gemaa awashime da'izhichigewag gaamiikinji'ishiwaaj giishpin "wiindang" gemaa "minzhigemoj".

Ga'maminzhitagozij gemaa gadibaajimoj	
Ga'mamizhitagozij	Ga'dibajimoj
Maminzhitagoziwin ga'ijigadeg e'onji gagwe maminzhimaganij awiya.	Gadibajimonaniwang ga'ijigadeg e'onji wiijichigadeg giin gemaa gaagikenimaj emiiganigoyeg gimashkawisiwin gaye gagikenimaj e'naniizani'igoyeg gibizanendamowiniwaa.

(Ontario ogikino'amagek mamawanokiiwin (OTF) gaye Le Centre Ontarien de prévention des agressions (COPA), *Ji'onachi'gadege weweni jiiizhisegin gikino'amadiiwigamigoon*, January 2012, pg. 56)

Gidoshkaadiziim gawin mayaa gawiindamagosiin giishpin gegoon izhi maazhisej gaye oga abajitoon o'owe ikidowin "ganibaajikagoj" gawin dash wii'ikidosiin "awiya gadabasamokiiij"jidibajimaaj ga'izhichigenij. Oshkadizag gegaa daswaa wiinawaa gagwe miinwatamaazowag ga'izhi maazhisewaa. E'inendamowaa ji'minwendasiwan, ji'makamaj omamakadabikoman, dabishkoo ogiigidowin, gemaa ji'ayagajij giishpin oniigi'igowaan gagwe wiiji'igowaaj.

Bizaan igo wiitazhindasig, gaagii onji nisidawinaan giishpin giniijaanis dabasamokanaganiwij. Mii'ono aanind gegoonan gegii onji nanagajitooyun:

- Abinoojiishag gadabasamokanindwaa gawin wii'izhasiwwag gikino'amadiiwigamigong gemaa gaye mawiwag gemaa akoziwwag megwaa gikino'amading.
- E'wiiijitwasig ga'izhichiganianig i'ima gikino'amadiiwigamigong gemaa i'ima ga'izhi mamawi izhichiganianig gegoon.
- Bakaan aniinaadiziwwag biichiwiin ga'inaadiziwaapun.
- Magizhwa gaye odaniwani'awaan ozhooni'amiwaan gemaa ota'iimiwaan, magizhwaa bigiwwewaaj wiige naanigishkaani ogishkiganiwaa ishkwa gikino'amagozij gemaa oda'iiman bii'goshkaanigin, gemaa nojigo gegoonan e'a'ikidobani'oj.
- Oshkaadizag gagichi nibaaji miikinji'indwaa gaye/gemaa gagichi nibaajikawaganiwij magizhwa da'ikido e'wii'izhasig gikino'amadiiwigamigong gaye ji'izhasig gegoon ga'izhi mamaw izhichiganianig.

Awiya ga'gidimagenjigej onisidawinaan gaye ogikendaan ga'inamanji'onij omoozhi'owining ga'izhi nagishkaminij. Eni'oshkiniigiwij bamaa odani gigishkaagon gaye apii gani giizhi giji'aawich miziwe ogigishkagon. Megwaa gi'abinojiishiwij, ogidimagenjigewin ani'ozhi'omagani apii abinoojiishag gamigoshkadendamowaaj gawabamawaaj godag awiyan emaanendaminij.

Aayanji dakokiiwin: Wiindamagewin oshkadizag onji, bakiiginigan 25

Niniijaanis dabasamokanaganiwi. Aaniin dash ge'izhichigeyaan?

- Bizhindaw giniijaanis gaye wiindamow gewin e'isisenig jibizaanenimoj.
- Weweni gikendan gegoonan. Ozhibii'an gagii izhiseg gaye anapii gagii izhiwebak.
- Wiiji'i giniijaanis bebakaan ezhisegin "gamaminzhigemoj" gemaa "gaawiindang" gaye gadibajimonaniwang. Apiji sanagan awiya jidibajimoj. Gadibajimonaniwang gawin onji gagwe mamizhi'aganiwisiin godak gikino'amawagan, gaye e'oji gagwe wiiji'indwaa gakina gikino'amawaganag.
- Onatamow jiwabamaj giniijaanis gaagikino'amgoj, godag gaye ga gikino'amagej giniijaanis ge'apenimondawaaj gemaaga'ogimaawij i'imaag gikino'amadiiwigamigong.
- Sanagan o'owe izhisewin, miibigo'i izhi gagwe wiijigabawitaw giniijaanis gaye onatamow aaniin ge'izhi wiidokawaj.
- Gegowiin onji bakeshkaaken. Onji nanagadawaabam ge'inaadizij. Giishpin dash ga'ishkwa wabamadwaa gikino'amadiiwigamigong ga'anokiiwaaj gegoon dash dodasigwaa, miinawaa giuweshkaan ji'andawi gaganonaj ga'ogimawij. Wiindamow dash gagii izhi onato'amban gawii izhichige'waa jigitinamowaaj gaamiikindizinaaniwang.
- Ganoozh ga'gikino'amagej gemaa odamino'iwewin gagikino'amagej giishpin geyaabi dabasamokiinaniwang ga'odaminonaniwang ga'ishkwaa gikino'amadinaniwang.
- Ganoonik dakoniwewiniwag giishpin dabasamokiiwin dagwiimagak gichi mamaazhiwining, dabishkoo bishigwaji dodagewin gemaa e'gii abadak miigazowi abajichigan, gemaa giniijaanis e'naniizanenimoj gegoon jidodawaganiwij megwe daawining biichiwiin gikino'amadiiwigamigong.

Aaniin ge'izhi wiidokawag niniijaanis giishpin dabasamokanaganiwij?

Ji'wiiji'iweyun gikino'amadiiwigamigong ga'wiidokawaaj giniijanisan gemaa gi'doshkiniigiiman aaniin ge'dodang awiyan dabasaamokanigoj, giin ga'onji gikinawaabamik aaniin gaa'izhichigewaj gaye ji'onji gikendang dabasamokiiwin eminwashisinog.

Aaniinigo ga'ipiitadiziwaaj, mii'imaag ge'onji wiiji'aj giniijaanis jiwindamawik giishpin dabasamokanaganiwij gaye oweni ji'wiindamawaj:

- Miibigo izhi babizanizin gaye **niigadegaabawiitan** iimaanake ga'izhi mazhisej.
- **Wiindamow gagichi'awaadizij** ga'apenimondawaj – ogikino'amage, gikino'amage, gabimibizo'iwej gemaa ganaganagajichigej i'imaag wiisiniwigamigong – aaniin gaagii izhisenig gemaa gawin wiindan giwiinzowin dibajimoyun.

- **Wiindamawik** giiiji'nitaawigiimaganag, gemaa gidodemag, jii'nendasian niineta o'owe ga'izhiseyaan.
- **Izhi'giigidon abinoojiishag ga'onji wiiji'indwaa**, o'omaa 1-800-668-6868 gemaa inaabin mamakadabikong **www.kidshelpphone.ca**

Niniijaanis na gewiin izhichige edabasamokaniwej?

Abinoojiishag ga'dabasaamokiiwaaj eshkam izhichigewag ga'izhidawaaj gaye gikino'amadiwigamigong gaye pizindow giniijaanis gigabeshiwining. Giwabamaa na bezhig giniijaanis e'wiitabasamokaanaaj owiiji nitawigiimaganan.

Abinoojiishag ga'dabasaamokaniwewaaj eshkam gaye akwadiziwig gaye migoshkaagendagiziwig ga'izhidaawaaj gaye gawin jibiminizha'amowaaj odonaakonigoowiniwaa ga'izhidawaaj. Giishpin migoshkaadendaman magizhwa giniijaanis etabasaamokii, onji nanagadawaabam aaniin ezhi wiijiwaaj wiiji'a'aan, ezhi wiijiwik gaye ododemaal ga'bi'odisigoj giwaka'iganing. Giishpin izhiwabamadwaa e'akwadiziikandaadiwaaj, gemaa eminowiiwidisigwaa gemaa ekidimagenjigesigwaa – mii'omaa ge'onji wabandaman etabasaamokiiwaaj gikino'amadiwigamigong.

Abinoojiishag ga'dabasaamokaniwewaaj gawiiji gikino'amagoziimawaaj magizwage gewinawaa dadago apisiwig, ji'nanameziwaaj gemaa ji'biigoshkaanig ogigishiganiwaa. Gemaa niibiwaa da'onji ozhooniyami gemaa gaye ji'onji batiinadinig oshki gegoonan ji'ayawaaj dabishkoo wiikaa ga'debi diba'sik. Magizhwa gaye "damamashkawitagoziwig" ini ji'dazhimawaaj godagiyan gikino'amawaganan.

Awia gadabasaamokii gichi wiikaa ani bimi ozhi'omagan gemaa ga'ishkwaa gichi mazhisaniwak, gemaa giniijanis gemaa gidoshkadiziim gegoon e'izhisej obimaadiziwiniwaang. Wiika na gigikenimaa giniijaanis o'owe ji'ishisej?

Daga nanagadawendan aaniin mazhisewinan gaye azhidemidiwinan enanokadameg gi'waka'iganing. Weweni na gi'mamawi wiindamadinawaa ga'inendameg ga'wiijidamidiyeg? Mii'owe bezhig gegoon gegii izhi wiidokameg ji'abajitosigwaa dabasaamokiiwin gaye jiwabamikwaa giniijaanisag aaniin ga'izhi anokadaman gegoon gii'mazhisej ji'abajitosiwan akwadiziwin.

Apiji gichinendagwan ji'wiinamawadwaa giniijaanisag wegoneniwak dabasaamokiiwin ga'ijigaadeg. Gidaa wawiindamawaa bebakaan ga'izhinagwanigin dabasaamokiiwinan miina jiiwiindamawaj e'majendagwak awia gaa'dodawinj. Wiidamow giniijaanis enendaman dabasaamokiiwin gaye e'andawendagosinog awia i'we jii'zhichigej.

Aaniin gikino'amadiiwigamigoon e'todamowaa gii'dabasaamokiinaniwak gaye godagiyan mazidodagewinan?

Gikino'amawaganag gadabasamokanaawaaj awiyan, bizaan igo gamotinaaj gemaa mamakadabikong, gawin dabagidinaasi ji'izhichigej.

Apii gii'anokaadeg dabasamokiiwin, gikino'amagewigimaag obiminizha'anawaa bimi ayangwamiziwin gikino'amawagan nana'achigewin. O'owe Ontario bimi ayangwaamiziwin onakonigan ogawiiji'igon gikino'amagewigimaa ji'onji onendangingabaatiinwegakin onakoniganan ge'onji nana'asaganiwij gaye wiiji'igoj gikino'amawagan jigikendang odizhichigewining. Aanind ono na'achigewining:

- gikino'amawagan da'Inaganiwi jiwiindang ominjinawesiwin noojigo gaye ge'onji majendami'iwej gaagii a'ikidoj
- dagiiwe nanagajichi gadeni obagosenimigowin gikino'amawagan
- danagishkawawag oniigi'igomaag gemaa oganawenimawasooj
- gaganoozhiwewin onishkaadizhiwining onji
- gikino'amawagan dagiiwenizhawaganiwe.

Giishpin nawaj egii giji izhichigej, gikino'amagewigimaa da'ikido gikino'amawagan gikino'amadiiwigamigong ji'onji zagidakonaganiwij giispin gikino'amawagan azha miinawaa odanaag egii giiwenizha'iganiwij gadabasaamokiiij gaye dash aanjigo geyaabi epimi migoshkaaji'iwej. Ono onaakoniganan abadanoon ga'agaashiishiwaaj gaye aay skool gikino'amawaganag jibiminizha'amowaaaj.

O'owe nana'achigewin wiiji'iwemagan awashime miinawaa jidodasigwaa maazhi dodagewining gaye ji'onji maazhi dodagowaaaj gakina gikino'amawagan gikino'amawaganag gaye ga'izhi nisidawinamowaaaj a'penimowin jii'zhiseing gaye i'ima gikino'amadiiwigamigong. Mii'ima gaye e'onji wiiji'igawaaaj gikino'amawaganag weweni ji'wiiji'widiwaaj gaye o'wiiji'igon gikino'amawagan ji'gikendang wiin ekanawabamigoj odizhichigewin gaye geyaabi ji'ani bimi gikendang wewni ji'wiijiwaaj babakaan awiyak.

Gikino'amadiiwigamigoon da'onji bagidinigaade o'daasoshkamaagowiniwaa gakina gikino'amawaganag gagii tabasaamokiiwaaj, gikino'amawaganag gagii tabasaamokanindwaa, gikino'amawaganag gagiiipi dabasaamokiiwaaj, gaye gagii wabangewaaj dabasaamokiiwining.

Gakina gikino'amadiiwigamigoon gaye ga'abiitamaagewaaj andawendagoziwag ji'ayaawaaj:

- onaakoniganan jinagaanamowaaaj gaye ji'anokaadamowaaaj dabasaamokiiwinan
- dabasaamokiiwi gibitinigewin gaye nagaanigewin onachigewinan
- onaakoniganan ge'izhi nana'asindwaa gikino'amawaganag gaye dabida gaye dagwagimigoowining gikino'amagewining.



Gakina abii tamage anokii'aganag andwendagoziwag jidibajimowaaj gikino'amawaganag ogichi izhiwebiziwiniwaa, dabishkoo dabasaamokiiwin, wedi gikino'amagewigimakaang. Gikino'amagewigimaag andawendangoziwag ji nanandawigikendamowaaj gakina gegoonan gaagiipiizhi dibaajimotawindwaa dabasaamokiiwini.

Abii tamage anokii'aganag ga'anoka'wawaaj gikino'amawagana'i, dabishikoo ogikino'amagek, gabimi nanagaji'awaaj gaye gabimi gikinoshkaagewaaaj, andawendagoziwag ji'nanagajitoowaaj gakina gamaanadakin gemaa weweni ga'izhinagwasinog dodamowinan gegii onji wanishkwechigemagak gikino'amadiiwining, dago gaye dabasaamokiiwini.

Gikino'amagewi abii tamaagewinan andawendaagoziwag jibagidinamowaaj moozhag ge'abadakin wiji'iwewinan, naganigewinan gaye godagiyan ge'onji aa'sonindwaa gikino'amawaganag gagii wabangewaaj dabasaamokiiwini gaye gaagiipi dabasaamokiiwaaaj.

Geyabi wiikikendaman aaniin anokii'aganag e'todamowaaj ga'nanagajitowaaj izhisewinan gikino'amadiiwigamigong, inaabin "dibaajimowin gaye ga'nanokaadeg" bakebii'iganing ogimaawin mamakaadabikong o'omaa www.edu.gov.on.ca/eng/safeschools/reportingResponding.html gemaa gagwejim gikino'amagewigimaa giishpin wiikikendaman wegonen dinowi wiji'iwewinan gikino'amadiiwigamigong

Gikino'amagewigimaag andawendaagoziwag ji'ganoonawaaj gikino'amawaganag oniigi'igomaan gaye oganawenimawasoog gagii tabasaamokaanindwaa, dago gaye igi gikino'amawaganag gagii tabasaamokiiwaaaj, gaye ji'wiindamowaaj:

- aaniin ga'izhiwebak
- aaniin ga'izhi maazhi dodawaganiwij gikino'amawagan
- aaniin gaa'izhi onachigaadeg ge'izhi ganawendaagozij gikino'amawagan, dago gaye nana'asigoowining gaagii mamaazhikandaagaaniwak
- wegonen dinowi wiidookaagewinan ge'miininj gikino'amawagan gaagii mamaazhikandaagaaniwak.

Dago gaye:

- Gikino'amagewigimaag oga naagotamawaan oniigi'igamaa'i ji'dazhindamaadiwaaaj aaniin gegii izhi wiidokawindwaaban oniijaanisiwaan.

Giishpin ninijaanis dabasaamokaazoj, aaniin ge'izhi andawenimagwaa gikino'amagewining ga'ayawaaj ge'izhichigewaaj?

Gikino'amagewining andawendaagwan ji'inateg ji'gii izhiseg giin, gikino'amawaganag gaye godagiyag awiyag ji'wiidasigwaa aweneniwawaaj ji'dibaajimowaaj gagii wabangewaaj dabasaamokiwiini.

Giishpin onjiinendami'ik ginijaanis gemaa bigo wiinanandawigikendaman, nanandooshkamaagen e'wiiwabandaman:

- Gikino'amagewi abitamagewining dabasaamokiwi nagaanigewin gaye gibitinigewin onaakonigan.
- Gikino'amagewining onaakonigewin, gagii onachigadeg aaniin gikino'amawaganag, o'gikino'amageg, gaye godagiyak gaa'babaamiziwaaj gikino'amadiiwigamigong ge'ishi ganawabanjigadeg.
- Gikino'amadiiwigamigong gaye odabiitamaageg dabasaamokiwi nagaanigewin gaye gibitinigewin onachigewin. O'owe mazina'igan niibidebii'igaadewan aaniin anokii'aganag gedodamowaaj ji'nanaagajitowaaj gegoon gamaazhisenig.
- Gikino'amadiiwigamigong nanandawi gikenjigewi gagwedewinan. Ono gagwedewinan gagii pagidinigaadesinogin wiisowinan odoonji wiiji'igonawaa gikino'amadiiwigamigoon ji'nanaagajitoowaaj aaniin enendamowaaj ayangwaminigewin gaye ge'izhi onenjigaadegin jinagaanigaadeg dabasaamokiwin gaye jiwijigaabawiichigadeg ji'bisaanak gaye jimino wijiwidinaniwak gikino'amadiiwigamigong. Andawendaagwan ganage daso niizhobiboon gagwedewinan ji'bagidinigaadegin.

Giishpin anokii'aganag gikendamowaaj ginijaanis e'maanenimaganij, gikendan jibiwiindamaagoyun, jigikendamun gaye ginijaanis gaa'gikino'amaagoj gemaa godak ga'gikino'amaagej ginijaanis gaagichiinenimaaj oga onji waawiji'aan aaniin gedodaminij ge'izhi nana'atoonij gaamaazhise'igoj odabasaamokanigowin.

Gikino'amadiiwigamigoon inakonigadewan jinanagajitowaaj ga'izhi maazhisej gikino'amawagan, gaye jibabaa dibajimonaniwasinog gikino'amawagan odizhisewin.

Gikino'amadiiwigamigoon da'onji wiiji'awag gakina gikino'amawaganag ga'dabasaamokiwaaj. Gaye igi ga'dagwiiwaaj dabasaamokiwin, gaye gadabasamokaanindwaa gaye gawabangewaaj dabasaamokiwin.

Gikino'amadiiwigamigong ogii onatoonawaa gebiminizha'aman giishpin danendami'igoyun ga'ishi onatenig ginijaanis o'wiiji'igowin, giishpin andawendasowan Gikino'amadiiwigamigong gagii izhi gagwe anokaadeg mamiinonigewin, ganoozh mayaa ga'onji niiganishkang gikino'amagewi abitamagewining.



Miinawaa dash, gidaagii tagwii i'maa ga'mamawanokadamowaaj ji'bizaanendaagwak gikino'amadiiwigamigoon gikino'amadiiwigamigong gidazhiikewining. Owaawijitoonawaa jibizaanendagwanig gaye jimino wijiwiidinaaniwak biindig gikino'amadiiwigamigong. I'maa ga'babaamiziwaaj dagwiuwag gikino'amagewigimaa, ganage bezhig oniigi'igomaa, gikino'amage anokii'agan, gikino'amawagan gaye dazhiikewining gaa'wiidanokiimiwej.

Niniijaanis wiin gawin dagwiisiin ga'izhi manenjigaaniwanig...

Gakina awiya onji maanendam gadabasaamokiinaaniwak, gaye izhinaagwan gakina awiya jigii gibitinangiban. 85% gaa'izhisegin ono dino, dabasaamokiwin bayatenaagwan awiya ga'izhichigej bizaanigo e'waabaminj, igi dash ga'wabangewaaj gawin jigibitinigewaaj gamajichigaaniwanig ekotaajiwaaj gewiinawaa jimiiiganindwaa gaye magizhwaa awashime jidodawinj gaa'maneniminj.

Gidaagii onji gagwe nisidotamonaa gidabinoojiishim dabasaamokiwin emaanadak gaye e'andawendagosinok awiya ji'izhichigej gaye jiwiindamawaaj gewiin jiwijitwaaj jikibitinigaadeg.

Ga'wiidokigadeg minowijiwidiwin dagii onji gibitinigaade dabasaamokiwin

Dabasaamokiwin nagaanigewin gaye gibitinigewin gawin igo eta i'we ga'ijigaadeg gaa'gagwe nagaanigaadeg dabasaamokiwin.

Weweni wijiwidiwinan izhi babamiziimagan e'onji manaadenimidiwaaj awiyag, bizaan ga'onji beshwabamidiwaaj gemaa mamakadabikong. O'owe ga'dojigaadeg wiji'iwemagan gikino'amawaganag jiminosenig, jibizaanisenig gaye jizhawenjigewiniwanig gawijiwigowaaj gakina awiyan.

Ogikino'amagek, oniigi'igomaag gaye godagiyak gagichi'awiwaaj onji asoshkamaagewag gaye dodamoog ji'onji nanaapinaagowaaj abinoojiisha'i aaniin weweni wijiwidiwin ezhinaagwak. Abinoojiishag weweni dagii onji wijiwidiwag giishpin wabamaawaaj gichi'aag minowiji'widiwaaj.

Gikino'amawaganag gamino wijiwidiwaaj gawin da'izhiyaasiuwag ji'dabasamokiwaaj, nawaj oga,nadamawawan gikino'amawaganan gamiigaaniminj, gaye weweni dabimi gikino'amagozi. Gawijichigaadegin minowijiwidiwinan mii'owe mayaa geminoseg ji'onji nagaanigadeg dabasaamokiwin gaye jiminoshkaamagak gikino'amagewin.

Ga'izhi wijiitoo'aang Ontario gikino'amagewigamigoon jibizanendagwakin

Weweni ji'inendaagwak gadazhi gikino'amading gaye jibizanendaagwak biindig gadazhi gikino'amading mii'ono ekichiinendagwakin jigii onji wiji'igopan gikino'amawagan jiminoselj i'maa megwaa gikino'amagozij.

Geyaabi nanandawigikendan ono:

- **Jibizanendagwak gikino'amadiiwigamigoon onchigewin.** O'owe onachigewin izhi onte gakina gikino'amadiiwigamigoon gayaagin ge'anokadamowaaj o'owe izhisewin, gikino'a'madiiwigamig ji'onjisegin ge'abadakin ji'gikino'amaginiwak. Ji'gikino'amawindwaa ga'gikino'amagewaaj gaye ganiiganishkamowaah gikino'amadiiwigamig, gaye ji'onji wii'danokiimawaaj abinoojiishag ga'izhi giigidowaaj wiiji'iwewin ga'andawendamowaaj. www.ontario.ca/acceptingschools
- **Gikino'amadiiwigamigowi nanandawi gikenjigewin gagwedewinan oniigi'igomaag gaagii miinindwaaban.** O'owe gagwedewin 22 izhigiizhwewinan dagwanoon. www.edu.gov.on.ca/eng/safeschools/climate.html
- **Ontario ogimawinan ga'izhi anokadang ge'izhi ganawabamindwaa gamamaazhiiwaa.** "Gabimisege ge'inatamawindwaa gamamaazhiiwaa" miziwe ga'ikwaag gikino'amadiiwigamig izhi anokiimagan gaye weweni onji ayaa i'ima a biindig gikino'amadiiwigamigong. Odoonji wiiji'igonaawaa igi ga'ogimawiwaaj gikino'amadiiwigamigong aaniin ge'izhi ganawabandamowaaj ga'mazhiseng gikino'amawaganan gaye odoonji wiidokawawaan gikino'amawaganan ji'ondinaminij wiiji'iwewin ji'izhisesinog manenjigewin. O'owe onaakonogewines ozhibii'igaade i'ima www.edu.gov.on.ca/extra/eng/ppm/145.pdf
- **Onachigewinan gebiminizha'igadegin.** Gabiminizha'ang Ontario gikino'amagewi onachigewinan gakina gikino'amadiiwigamigoonge'biminizha'amowaaj mii'ima ezhi ozibii'igadeg wegonenigag gebiminizha'amak, dino gikino'amawaganag, oniigi'igomaag, gikino'amadiiwigamigowi anokii'aganag gaye i'ima dazhiikewining ga'onji wiidokaagewaaj. www.edu.gov.on.ca/eng/safeschools/code.html
- **Ontario odonaakonigan dabasamokiiwin naganigewin gaye gibitinigewin.** O'owe onakonigan niibidebii'igadewan ga'bagosenimindwaa gikino'amagewi abii'tamagag jiizhi onatowaaj gaye ge'bimi anokadamowaaj dabasamokiiwi naganigewin gaye gibitinigewin onakonigan. www.edu.gov.on.ca/extra/eng/ppm/144.pdf
- **Dabida gaye dagonigewin gikino'amagewin onachigan.** Niibi'debii'igade aaniin ogimaawin, gikino'amagewi abii'tamagag gaye gikino'amadiiwigamigoon ezhi bimiwidowaaj dabida gaye dagonigewin gikino'amagewin ji'dagwak Ontario gikino'amadiiwigamigoon. www.edu.gov.on.ca/eng/policyfunding/equity.html
- **Ogimawin omiigiwewinan gabimiwijigadeg jiminoseg gikino'amadiiwigamigoon.** O'owe naagotamaagewin onji nisidawinigadewan akonaag 10 ga'bizaanisegin gaye gaminosegin gikino'amadiiwigamigoon gagii pimi ganawendamowaaj jibisaaniseewaaj gikino'amawaganag gaye weweni jiizhi ganawabamidinaniwak. www.edu.gov.on.ca/eng/safeschools/award.html
- **Abinoojiishag ga'izhigiigidowaaj wiiji'iwewin.** O'owe gaganozhiwewi wiiji'iwewin bagidinigaade gabe'ii 24/7. Inaabin mamakadabikong www.kidshelpphone.ca Gemaa izhi giigidon **1-800-668-6868.**

Geyaabi wiindamaagewinan:

- **Dabasaamokiiwin ga'izhi wawijigaadeg oniigi'igomaag ji'gikendamowaaj, gagii'ozhitowaaj PREVNet (Ji'wiiichigadeg minowiiwidiwin gaye ji'azhenigadeg miigazowin mamawanokiiwin)** www.prevnet.ca/BullyingResources/ResourcesForParents/tabid/390/Default.aspx
- **Onii'gi'igomaag ge'izhi gikenimawaaj odooshkadiziimiwaa: Gedodamowaaj onii'gi'igomaag odooshkadiziimiwaan jiminosenij.** O'owe mazina'igan ozhipii'igadewan wiiwigewinan gaye godagiyan geagoonan jigikendamowaaj onii'gi'igomaag ge'izhi wawiiwawaaj odooshkadiziimiwaan weweni ji'gikino'amagozinij. www.ontariodirectors.ca/Parent_Engagement/Parent_Engagement.html
- **Ji'bizaanak gikino'amadiiwigamigong.** O'omaa mamakadabikong wiinjigadewan dabasamokiiwi naganigewin gaye dabida gaye dagonigewin gikino'amagewining, dago gaye jigikino'amawindwaa ogikino'amageg gaye anokii'aganag. www.safeatschool.ca
- **Aayanji dakokiiwin: Wiindamagewin oshkadizag onji.** Ogimaawin ga'onji anokanindwaa abinoojiishag gaye oshkaadizag gii'onji ozhichigade, wawiijigemagan aaniin eniizhi bimi gashki'oj oshkaadiz 12 biinsh 25 ga'dasobibonej, gaye aaniin ge'izhi nisidaweniminij gaye ge'izhi wiiji'aganiwij. Gamikaan o'omaa www.ontario.ca/steppingstones

Geyaabi wiikikendaman gaabiza'nendagwak gaye dagonigewin gikino'amadiiwigamigoon o'omaa

www.ontario.ca/acceptingschools

Andodan ga'diba'igadesinogin o'owe mazina'igan ga'zhaganaashiimomagak gaye ga'bakwa'ishiimomagak i'ima a anokiiwin Ontario o'omaa

www.ontario.ca/publications

Gamikaan o'owe mazina'igan gaye onii'gi'igomaag o'wiindamagowiniwaa batiinwayeg izhigizhwewining o'omaa

www.ontario.ca/EDUparents